

DOMENIE XII «VIE PAL AN»

Antifone di jentrade cf. Sal 27,8-9

Il Signôr al è une fuarce pal so popul,
pal so consacrât une crete di salvece.
Salve il to popul, Signôr,
benedìs la tô ereditât e indrecile par simpri.

Colete

Danus la gracie, Signôr,
di vê pal to non sant un timôr simpri compagnât dal amôr,
parcè che no tu lassis mai cence la tô guide
chei che tu ju âs inlidrisâts su la fonde dal to amôr.
Pal nestri Signôr Jesù Crist to Fi, che al è Diu
e cun te al vîf e al regne dutune cul Spirtu Sant,
par ducj i secui dai secui.

PRIME LETURE Jp 38,1.8-11

Chi si fermerà la supierbie des tôs ondis.

Dal libri di Jop
Il Signôr i rispuindè cussì a Jop stant tal mieç dal burlaç:
«Cui aial sierât il mâr cun doi puartons
cuant che al saltà fûr plen di fuarce dal grim de mari,
cuant che i ài dâts i nûi par vistîlu
e la fumate par fassâlu?
Po i ài metût un confin,
saldant clostris e puartis.
E i ài ordenât: Tu rivarâs fin chi e vonde,
e chi si fermerà la supierbie des tôs ondis!».
Peraule di Diu.

SALM RESPONSORIÂL dal Salm 106

R. Laudìn il Signôr pai siei spettacui.

Chei che par mâr cu lis nâfs a navighin
e che a trafichin su lis grandis aghis:
chei sî a àn viodudis lis voris dal Signôr,
te profunditât dal mâr i siei spiei. **R.**

Cuntun so ordin al à fat sbuereâ un aiarat di burascje
che lis ondis dal mâr al alçave:
a levin sù fin in cîl, fintremai tes sfondaris a plombavin.
La lôr anime tal grant afan e penave. **R.**

Te lôr disperazion a àn berlât viers dal Signôr
e lui ju à fats saltâ fûr dai lôr berdeis:
al à cambiât il burlaç in buerisine
e lis ondis dal mâr sî son bonadis. **R.**

Viodint dute chê pâs, si son jemplâts di gjonde,
e lui ju à menâts tal puart che a suspiravin.
Che i disin graciis al Signôr pal so boncûr,
pes robonis che ur à fat ai umign. **R.**

SECONDE LETURE 2 Cor 5,14-17

Ve che a son nassudis robis gnovis.

De seconde letare di san Pauli apuestul ai Corints

Fradis, al è l'amôr di Crist che nus sburte, pensant che un sôl al è muart par ducj e duncje ducj a son muarts. Lui al è muart par ducj, par che chei che a vivin no vivin plui par sè ma par chel che al è muart e risussitât par lôr. Pa la cuâl aromai no cognossin plui nissun seont la cjar; e se ancje o vin cognossût Crist seont la cjar, cumò no lu cognossin plui cussì. Duncje se un al è in Crist, al è une creature gnove; lis robis di prime a son passadis, ve che ind è nassudis di gnovis!

Peraule di Diu.

CJANT AL VANZELI cf. Sal 147,12.15

R. Aleluia, aleluia.

Laude, Jerusalem, il to Diu,
che al mande su la tiere i siei ordins.

R. Aleluia.

VANZELI Mc 4,35-41

Cui isal mo chel chi, che parfin l'aiar e il mâr i ubidissin?

Dal vanzeli seont Marc

In chê stesse dì, sore sere, Jesù al disè ai siei dissepui: «Passin sun chê altre rive». E lôr, mandade vie la int, lu cjapin sù cussì come che al jere su la barcje, biel che altris barcjis i levin daûr. Si discjadene un grant burlaç di aiar e lis ondis a plombavin su la barcje, che di fat la barcje e jere dibot za plene. Lui intant al jere sul daûr de barcje e al durmive suntun cussin. Alore lu svein e i disin: «Mestri, no ti impuartial propit nuie che o murin?». Alore lui, sveât, i cridà al aiar e i disè al mâr: «Tâs! Cuietiti!». E l'aiar al cessà e dut si bonà. Alore ur disè: «Parcè mo sêso cussì spaurôs? No vêso nancjemò no fede?». Alore lôr a cjaparin un grant spavent e si disevin un cul altri: «Cui isal mo chel chi, che parfin l'aiar e il mâr i ubidissin?».

Peraule dal Signôr.

Su lis ufiertis

Acete, Signôr, il sacrifici di pacificazion e di laude
e fâs che, purificâts di cheste nestre azion,
o podin ufrîti un cûr ben disponût e che ti plasi.
Par Crist nestri Signôr.

Antifone a la comunion Sal 144,15

I vôi di ducj viers di te si voltin e a spietin,
e tu tu ur dâs di mangjâ su l'ore juste.

O ben: Zn 10,11.15

Al dîs il Signôr: Jo o soi il bon pastôr
e o rimet la mê vite pes pioris.

Daspò de comunion

Diu, che tu nus âs fats tornâ gnûfs
cul Cuarp sant e cul Sanc preziôs di to Fi,
danus pal to boncûr di cjatâ une redenzie sigure
in ce che o fasìn dispès e cun devozion.
Par Crist nestri Signôr.